

Morning Dogri (NSD) National News Bulletin 22-10-2024

आकाशवाणी

- प्रधानमंत्री नरेन्द्र मोदी होर दऊं दिनें दे रूस दौरे पर रवाना होईं गे न, जित्थें ओह कजान शैहरा च लग्गने आले ब्रिक्स शिखर सम्मेलन च हिस्सा लेंगन।
- झारखंड ते महाराष्ट्र च होने आले विधानसभा चुनाएं लेई अधिसूचना अज्ज जारी कीती जाग।
- राष्ट्रपति द्रौपदी मुर्मू होर अज्ज 5में राष्ट्र जल पुरस्कार 2023 भेंट करगंन।
- गृहमंत्री अमित शाह अज्ज गुजरात च सिविल डिफेंस ते होम गार्ड दे 14में अखिल भारतीय शिखर सम्मेलन दा उद्घाटन करगंन।
- आंध्रप्रदेश दी राजधानी अमरावती च अज्जै थमां दऊं दिनें दे “अमरावती झोन सम्मेलन-2024” दा सरिस्ता कीता जा’रदा ऐ।
- दिल्ली ते एनसीआर च हवाएं दी घटा’रदी गुणवत्ता गी दिखदे होईं राष्ट्री राजधानी च दुए गेड़ दी प्रतिक्रिया कार्यवाहक योजना जीआरएपी लागू करी दित्ती गई ऐ।
- 7 मर्दे दी टी-20 इमर्जिंग एशिया कप क्रिकेट प्रतियोगिता च कल अल अमरत च भारत-ए नै संयुक्त अरब अमिरात यूएई गी 7 विकेटें कन्नै हराई दित्ता।

<><><><><><><>

PM-Russia

प्रधानमंत्री नरेन्द्र मोदी होर दऊं दिनें दे रूस दौरे पर रवाना होईं गे न, जित्थें ओह कजान शैहरा च लग्गने आले ब्रिक्स शिखर सम्मेलन च हिस्सा लेंगन। ब्रिक्स च शामिल 5एं मुख्यें ब्राजील, रूस, भारत, चीन ते दक्खन अफ्रीका दे नाएं दे पैहूले अक्खरें गी जोड़ियै इस संगठन दा नां ब्रिक्स रखेआ गेदा ऐ। इस शिखर सम्मेलन दा विषय सार ऐ “न्यायपूर्ण कुल संसारी विकास ते सुरक्षा लेई बहुपक्षवाद गी निगगर बनाना”।

कजान च मजूद आकाशवाणी दे संवाददाता कन्नै गल्लबात करदे होई रूस च भारत दे राजदूत विनय कुमार होरें आखेआ जे शिखर सम्मेलन नेताएं गी प्रमुख वैश्विक मुद्दे पर चर्चा करने लेई इक महत्वपूर्ण मंच प्रदान करोग। शिखर सम्मेलन दरान ब्रिस्क आस्सेआ शुरू कीती गेदी पैहलकदमिएं दी प्रगति दा बी जायजा लैता जाग। कुमार होरें अगगे आखेआ जे प्रधानमंत्री मोदी होर रूस दे राष्ट्रपति ब्लादिमीर पुतिन हुंदे कन्नै दपक्खी बैठक बी करगंन। तांई नमीं दिलली च कल प्रधानमंत्री हुंदे रूस दौरे बारे पत्रकारें कन्नै गल्लबात करदे होई विदेश सचिव विक्रम मिसरी होरें आखेआ जे भारत ब्रिक्स दा संस्थापक सदस्य ऐ ते इस संगठन दिएं गतिविधिएं च भारत दी अहम भूमिका रौंहदी ऐ।

<><><><><><>

Maharashtra

महाराष्ट्र च विधानसभा चुनां लेई अधिसूचना अज्ज जारी कीती जाग। राज्य दिएं सब्बने 288 विधानसभा सीटें लेई मतदान इक्कै गेड़ च 30 नवम्बर गी कराया जाग। नामांकन पत्र दाखल करने दी खीरी तरीक 29 अक्टूबर ऐ, जिसलै जे 30 तरीक गी नामांकनें दे कागजें—पत्रें दी जांच कीती जाग। मेदवार जेकर चाह्न तां 4 नवम्बर तोड़ी अपने नामांकन वापस बी लेइ सकदे न।

<><><><><><>

Jharkhand Notification

झारखंड च होने आले विधानसभा चुनां दे दुए गेड़ लेई बी अधिसूचना अज्ज जारी कीती जाग। इस गेड़ च कुल 38 सीटें पर 20 नवम्बर गी वोट पोआए जांगन। नामांकन दाखल करने दी खीरी तरीक 29 अक्टूबर होग जिसलै जे 30 अक्टूबर गी कागजें—पत्रें दी जांच होग मे मेदवार जेकर चाह्न तां पैहली नवम्बर तोड़ी नां वापस बी लेई सकदे न। उत्थें पैहले गेड़ दा मतदान 13 नवम्बर ते दुए गेड़ तैहत् वोट 20 नवम्बर गी पोआए जांगन। वोटें दी गिनतरी 23 नवम्बर गी होग।

<><><><><><>

President

राष्ट्रपति द्रौपदी मुर्मू होर अज्ज नमीं दिल्ली च 5में राष्ट्र जल पुरस्कार-2023 भेंअ करगंन। केन्द्री जल शक्ति मंत्रालय नै 9 श्रेणिं च 38 विजेतां दी घोषणा कीती ऐ। जिंदे च बेह्तरनीन राज्य, बेह्तरनीन जिला, बेह्तरनीन ग्रां-पंचैत, बेह्तरनीन शैहरी मकामी विकास, बेह्तरनीन वाटर यूसर एसोसिएशन ते बेह्तरनीन सिविल सोसायटी शामिल ऐ। साढ़े संवाददाता दी रिपोर्ट मूजब बेह्तरनीन राज्य दी श्रेणी च पैह्ला पुरस्कार आंध्रिशा राज्य गी, दूआ पुरस्कार उत्तर प्रदेश राज्य गी ते त्रीआ पुरस्कार गुजरात ते पुडुचेरी गी दित्ता गेआ ऐ।

<><><><><><>

Amit Shah

केन्द्री गृहमंत्री अमित शाह होर अज्ज गांधी नगर महात्मा मंदर च अखिल भारतीय सिविल डिफेंस ते होम गार्ड दे 14में सम्मेलन दा उद्घाटन करगंन। श्री शाह होर आनंद च राष्ट्री डेयरी विकास बोर्ड दे 60में स्थापना दिवस समारोह च हिस्सा लेंगन। मंत्री होर इस मौके पर एनडीडीबी दे त्रै नमीं परियोजनाएं च बी शामिल होंगन। मगरा गृहमंत्री होर गुजरात असेंबली च विधायकें दी इक सिखलाई समारोह च शामिल होंगन ते विधायकें गी संबोधन गी करगंन। अमित शाह होर दो दिनें दे गुजरात दौरे पर गेदे न। साढ़े संवाददाता नै खबर दित्ती ऐ जे सिविल डिफेंस ते होम गार्ड शिखर सम्मेलन 19 बरे दे वक्फे मगरा आयोजित कीता जा'रदा ऐ।

<><><><><><>

Amravati Drone Conference

आंध्रप्रदेश दी राजधानी अमरावती च अज्जै थमां दऊं दिनें दे “अमरावती ड्रोन सम्मेलन-2024” दा सरिस्ता कीता जा'रदा ऐ। राष्ट्रीय सतह दे इस सम्मेलन दा उद्घाटन मुख्यमंत्री एन.चन्द्रबाबू नायडू ते सिविल हवाबाजी सरबंधी केन्द्री मंत्री किजरापु राममोहन नायडू होर करगंन। इस शिखर सम्मेलन दा मकसद राई-बाई कोला लेई आपदा प्रबंधन तोड़ी सब्बने कम्में च ड्रोन प्रोद्योगिकी गी बढ़ावा देना ऐ। मंगल गिरि च सी.के कन्वेंशन सेंटर च लग्गने आले इस सम्मेलन च बक्ख-बक्ख क्षेत्रें च ड्रोन दी बधदी भूमका गी उजागर कीता जाग जिंदे च त्हारें पतिभागिएं दे हिस्सा लैने दी मेद ऐ।

कृष्णा नदी दे बड़े पुन्नमी घाट पर 5 जहार झ्रोंनं दा मेगा श े बी इस आयोजन दा आकर्षण बनोग ।

<><><><><><>

Delhi-NCR

दिल्ली ते एनसीआर क्षेत्र च ब्हाऊ दी खराब गुणपत्ता गी ध्यानै च रखदे होई ग्रेडिड रिस्पांस एक्शन प्लान दूआ गेड़ जीआरएपी अज्ज बडलै 8 बजे थमां लागू होई गेआ ऐ। इस बारे फैसला नमीं दिल्ली एनसीआर ते आले दोआले दे इलाके च ब्हाऊ दे मयार गी बनाई रखने सरबंधी आयोग दी उप-समिति दी बैठक दरान लैता गेआ। समिति नै लोकें गी अक्टूबर कोला लेइयै जनवरी तगर उनें निर्माण गतिविधिएं जां कम्में कोला बचने दी सलाह दित्ती ऐ जिंदे चलदे धूड़ उडदी ऐ। समिति नै ठोस कचरे ते जैविक इंधन गी खुल्ले च नेई फूकने दी बी सलाह जारी कीती ऐ। जीआरएपी-2 च 11 सूत्री कार्ययोजना पूरे एनसीआर च तुरत प्रभाव कन्नै लागू होई गई ऐ ते एहदे तैहत्त जारी नियमें ते दिशा निर्देशों दी सख्ती नै पालमा करनी होग।

<><><><><><>

T-20 Emerging Asia Cup

मर्दे दी टी-20 इमर्जिंग एशिया कप क्रिकेट प्रतियोगिता च कल अल अमरत च भारत-ए नै संयुक्त अरब अमिरात यूएई गी 7 विकटें कन्नै हराई दित्ता। पैहले बल्लेबाजी करदे होई यूएई दी पूरी टीम 107 रंज पर आउट होई गई अजें कि 3 ओवर ते 1 गेंद अजें बाकी हे। एहदे परते च अभिशोक शर्मा दी 24 गेदें च 58 रंल इह पारी दी मदद कन्नै भारत-ए 11में ओवर च 7 विकटां बाकी रौंहदे। जित्त हासल करने च कामयाब रेआ। इंडिया-ए लेई रसिख सलाम नै दऊं ओवरें च शड़े 15 रंल देइयै त्रै विकटां हासल कीतियां जेह्दे लेई उनेंगी प्लेयर ऑफ च मैच घोषत कीता गेआ। भारत-ए दा अमला मैच कल बुधवारें मेजबान ओमान कन्नै हगे।

<><><><><><>

JK Farooq

जम्मू कश्मीर दे साबका मुख्यमंत्री ते नैशनल कांफ्रेस दे अध्यक्ष डॉ. फारुक अब्दुल्ला होरें केन्द्र शासत प्रदेश च होए दे आतंकी हमले लेई पाकिस्तान गी जिम्मेदार ठैहरांदे होई आखेआ जे जेकर पाकिस्तान भारत कन्नै दोस्ताना जाल्लुक चांहदा ऐ तां उसी जम्मू कश्मीर च आतंकवाद फैलाना बंद करना होग ते इस चाल्ली दिएं वारदाताएं गी रोकना होग। उनें आखेआ जे जिच्चर पाकिस्तान जम्मू कश्मीर च आतंकवाद गी ब्हा देना बंद नेई करदा, ओहदे कन्नै कोई बी कुसै बी किस्म दी गल्लबात नेई कीती जाई सकदी। उनें आखेआ जे गगनगीर च होई दी आतंकी वारदात बड़ी दर्दनाक ते मंदे भागें आली ऐ जेहदे च आतंकवादिएं गरीब मेहनत कश मंजूरें गी नशाना बनाया। फारुक अब्दुल्ला होरें पाकिस्तान गी सलाह दित्ती जे जम्मू कश्मीर दे लोकें गी रमानदारी कन्नै जीन देयै ते बेहतर होग जे साढ़े अंदरूनी मामलें च दखल देने दे बजाए अपने देसै दे विकास बक्खी ध्यान देवै।

<><><><><><>

Viatnam Presi

जुओंग कुओंग होरें गी वियतनाम दा नमां राष्ट्रपति चुनेआ गेआ ऐ। ओह वियतनाम दी कम्यूनिस्ट पार्टी दे मिंबर न। वियतनाम दी 15मीं नैशनल असेंबली दे मजूदा 8में सत्र च कुओंग होरें गी 2026 तगर राष्ट्रपति चुनेआ गेआ ऐ। नैशनल असेंबली च मजूद सब्बने प्रतिनिधिएं, जिंदी गिनतरी 440 ऐ ने लुओंग कुयोंग हुंदे हक्कै च वोट पाइयै उनेंगी समार्नि दित्ता। कुओंग होर टू-लेम हुंदी थाहर राष्ट्रपति दा औहदा साम्बगन।

<><><><><><>